

## Ontmoeting 8

# EMMAUSGANGERS

Luk 24:13 – 15:

- viltbord met 3 figure: Jesus en die 2 Emmausgangers
- prent van broodjie



### WELKOM

Sing: "Ek is nie 'n stapsoldaatjie nie" (Jan de Wet en die Loflaaitjies 2)

"Hy leef, Hy leef, Hy leef" (Lofkleuters 1)

"Jesus leef" (Lofkleuters 1)

"Voel"-speletjie: Plaas 'n paar bekende goed in 'n kussingsloop of sak, bv. potlood, plastiekglasie, vrug, liniaal, balletjie, rekkie, ens. Elke kind kry 'n kans om sy hand in te steek, aan 'n item te voel en te raai wat dit is. Daarna haal hy/sy dit uit en kyk of hy/sy reg is.



### WYDING

**Stilword-ritueel:** Gaan sit rug aan rug met 'n maatjie op die vloer en probeer sy of haar asemhaling hoor en voel hoe jou maatjie se rug op en af beweeg soos hy/sy asem haal. Hiervoor moet julle baie stil wees en mooi luister. Sit vir 'n tydjie so. Onthou dat die Here ook hier is en dat elke asemteug 'n genade is.

Gebedsketting met gebede op papierstroke wat die kinders kan aflees:

*U is die Skepper van alles, Here.*

*U hou alles in die heelal op die regte pad.*

*U is die God van Abraham, Isak en Jakob.*

*U het al deur die profete voorspel dat Jesus gebore sou word.*

*U het voorspel dat Jesus sou ly en sterf.*

*Dankie, Jesus, dat U in ons plek gesterf het.*

*U Naam is groot oor die aarde.*

(Die stroke kan agterna aan mekaar vasgekram word om 'n gebedsketting te vorm.)

### Temalied vir kwartaal 2:

"Ek hef my hande op" van Luidkidz.



### WOORD

*Gebruik 'n viltbord en prente om die volgende storie te vertel:*

Twee mans wat altyd by Jesus se dissipels was, was op pad van Jerusalem af na die dorpie Emmaus toe. Emmaus was omtrent 12 km van Jerusalem af. Hulle het met mekaar gepraat oor alles wat met Jesus gebeur het. Hulle was bitter hartseer dat Hy gekruisig is. Terwyl hulle daarvoor wonder en praat, het Jesus self nader gekom en saam met hulle geloop. Hulle het Hom glad nie herken nie. Hy vra toe vir hulle: "Waaroor loop julle so met mekaar en praat?"

Die twee mans het gaan staan. Hulle was baie hartseer. Kleopas, een van die mans, vra vir Jesus: "Woon jy nie in Jerusalem nie? Weet jy nie van al die dinge wat hier gebeur het in die dae wat verby is nie?"

Jesus het vir hulle gevra: "Watter dinge?"

Die twee mans vertel toe vir Jesus die hele verhaal van hulle vriend, Jesus, wat gevang, gekruisig en begrawe is. (Hulle kom nog nie agter wie saam met hulle stap nie.) "En nou hoor ons daar is van ons vriende wat sê dat hulle Hom gesien het, dat Hy opgestaan het uit die dood", het hulle baie ontsteld vir Jesus vertel. Jesus het begin om geduldig aan hulle verduidelik wat Moses en al die profete oor Hom geskryf het. Hy het vir hulle vertel dat God belowe het dat Sy Seun weer sou opstaan uit die dood.

Hulle het aandagtig na elke woord wat Jesus sê, geluister en voor hulle hul kom kry was die 12km verby en was hulle in Emmaus. Jesus het gemaak of Hy verder wou loop. Die twee mans wou meer hoor en nooi vir Jesus om by hulle te bly. Dit was al amper aand. Jesus het saam met hulle by die huis ingegaan en by hulle gebly. Hulle het gaan aansit om te eet en Jesus het die brood geneem (soos Hy altyd gedoen het voor sy kruisiging) en God gedank daarvoor. Hy het die brood gebreek en vir die twee mans gegee. Toe het God hulle laat sien dat dit Jesus was. Maar Jesus het skielik verdwyn en hulle kon Hom nie meer sien nie.

Die mans het nou besef waarom Jesus so opgewonde was om vir hulle alles te vertel en uit die Bybel te verduidelik. Hulle het dadelik opgestaan en in die donker na Jerusalem teruggegaan. Daar het hulle die elf

dissipels en ook ander mense by hulle gekry. Hulle was opgewonde besig om te vertel dat hulle vir Jesus gesien het, toe Jesus skielik tussen hulle staan en vir hulle sê: "Vrede vir julle!" Almal het groot geskrik en gedink dis 'n spook, maar toe hulle aan Hom vat, het hulle gevoel dat dit regtig Hy was.

### Die kinders dink na oor die verhaal:

- Ek wonder van watter deel van die storie het jy die meeste gehou.
- Ek wonder watter deel van die storie dink jy is die belangrikste.
- Ek wonder hoe dit sou gevoel het om aan Jesus te raak.

### Sluit af met die seëngroet:

Leier: Mag die Here met jou wees hierdie week waar jy ookal gaan.

Kinders: En met jou ook.

Leier: Mag jy hierdie week in Jesus se voetspore stap.

Kinders: Stap, stap, stap.



## WERSKAF

- Sandbak met mannetjies om die storie uit te speel.
- Teken 'n kronkelpaadjie op die sement of met tou op die vloer. Elke kind kan rustig daardeur stap soos wat die Emmausgangers saam met Jesus gestap het.
- Voorsien ekstra bakke sand waarop die kinders spootjies kan vorm met hulle handjies.
- Voorsien papier en verf. Sit 'n voorbeeld neer van 'n voetafdruk of twee.



Gebruik gerus hierdie prente op 'n viltbord. Knip die prente mooi uit en plak 'n lang strook vilt agterop elkeen. 'n Mens kan vilt of flennie op 'n stewige karton of hout of selfs die kante van 'n 5-liter koeldrankboks plak om as 'n viltbord te gebruik.

Brode (regs) om saam met Emmausgangers en Jesus (links) te gebruik vir ontmoeting 8.

